

Na osnovu člana 30. stav (1) tačka c) i stava (2) i člana 33. Zakona o plaćama i naknadama u institucijama Bosne i Hercegovine ("Službeni glasnik BiH", broj 50/08), člana 50. stav (4) tačka c) Zakona o radu u institucijama Bosne i Hercegovine ("Službeni glasnik BiH", broj 26/04, 7/05 i 48/05) i člana 17. Zakona o Vijeću ministara Bosne i Hercegovine ("Službeni glasnik BiH", broj 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine na 81. sjednici, održanoj 26. marta 2009. godine, donijelo je

## **ODLUKU**

### **O NAČINU I POSTUPKU OSTVARIVANJA PRAVA NA REGRES ZA GODIŠNJI ODMOR U INSTITUCIJAMA BOSNE I HERCEGOVINE**

**Neslužbeni prečišćeni tekst ("Službeni glasnik BiH", br. 38/09, 70/09 i 87/15)**

#### **Član 1.**

Ovom Odlukom uređuje se način i postupak ostvarivanja prava zaposlenih u institucijama Bosne i Hercegovine na regres za godišnji odmor, u skladu sa članom 33. Zakona o plaćama i naknadama u institucijama Bosne i Hercegovine i članu 50. stav (4) tačka c) Zakona o radu u institucijama Bosne i Hercegovine.

#### **Član 2.**

(1) Pravo na regres za godišnji odmor iz člana 1. ove Odluke ostvaruju zaposleni koji imaju pravo na plaćeni godišnji odmor.

(2) Zaposleni koji se zaposlio u institucijama Bosne i Hercegovine poslije 30.06. tekuće godine, a nema prekida rada dužeg od pet dana, ima pravo na regres za godišnji odmor ukoliko dokumentuje da kod pravne osobe ili institucije Bosne i Hercegovine kod kojih je bio zaposlen nije primio regres.

(3) Zaposleni koji se prvi put zaposli ili koji ima prekid rada između dva radna odnosa duži od pet dana ima pravo na regres u iznosu od 1/6 regresa utvrđenog u skladu sa članom 33. stav (2) Zakona o plaćama i naknadama u institucijama Bosne i Hercegovine i to za svaki navršeni puni mjesec tokom fiskalne godine.

#### **Član 3.**

(Visina regresa za godišnji odmor)

Visinu regresa za godišnji odmor za fiskalnu godinu utvrđuje Vijeće ministara Bosne i Hercegovine podzakonskim aktom, koji se donosi do 30. juna tekuće godine za narednu godinu.

#### **Član 4.**

(1) Obračun i isplata regresa za godišnji odmor za zaposlene u institucijama Bosne i Hercegovine vrši se uz mjesečni obračun i isplatu plaća i naknada zaposlenih u institucijama BiH na osnovu pojedinačnih rješenja o korištenju godišnjeg odmora u institucijama Bosne i Hercegovine.

(2) Obračun i isplata regresa za godišnji odmor za zaposlene u institucijama Bosne i Hercegovine može se vršiti u više dijelova s tim da u tom slučaju Vijeće ministara posebnom odlukom utvrđuje visinu svakog dijela.

#### **Član 5.**

Za realizaciju ove Odluke zadužuju se institucije Bosne i Hercegovine i Ministarstvo finansija i trezora.

#### **Član 6.**

Odluka stupa na snagu narednog dana od dana objavljivanja u "Službenom glasniku BiH", a primjenjivat će se od 01. 01. 2009. godine.

VM broj 78/09  
26. marta 2009. godine  
Sarajevo

Predsjedavajući  
Vijeća ministara BiH  
Dr. **Nikola Špirić**, s. r.